

06. november 2019

UKA 2019/32

**Nunatta inuiattut timersornikkut unammersuarterfissaanik FIFA-p piumasaqaataanut naapertuuttumik pilersitsinerup avataaniit aningaasaliisussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq aningaasalersuinissamik misissuinerup inerneranik UKA2020-imi Naalackersuisut Inatsisartunut saqqummiutissagaat.**  
(Inatsisartunut ilaasortaq, Anders Olsen, Siumut)

Siumut sinnerlugu Inatsisartunut ilaasortaq Anders Olsen aaliangiiffigisassatut siunnersuutaa Siumumiik imaattumik oqaaseqarfigissuarput.

Inuiaqatigiit akornanni timersornerup pingartinneqariartuinnarnera nuannaarutissaavoq. Nunatsinni kommunit ilai timersorneq siuarsarniarlugu qaffasissumik peqatigiiffinnut tapiissuteqartarput aammalu meeqqat kikkulluunnit timersorsinnaanerata anguniarlugu qulakkeerinnittumik aningaasaliissuteqartalerlutik.

Tassami nunarput timersornikkut annertuumik suli siuarsagassaavoq, inuussutissarsiutigalugu nunanut allanut unammisartuuneq suli tamakkiisumik aallutissagaanni annertuumik iliuuseqartoqartariaqarpoq. Silami ivigaasaaqqanik arsaattarfiit qujanartumik inerisarneqarput tamakkaa tamarmik iluaqutaassapput siuariartuutaallutillu sulili annertunerujussuarnik anguniagassaqarpugut.

Kultooreqarnermut Naalackersuisuunerma Naalackersuisoqatigut peqatigalugit aammalu kommunit, timersoqatigiiffiit kattuffii allallu suleqatigalugit Pan Am Nuummi ingerlapparput, inuiaqatigiinni pissatsiffiulluurtumik ataatsimoorfiulluurtumillu. Tassaniinnarluunniit takusinnaavarput inuiaqatigiittut qanoq nukittorsaataatigisoq aammalu nunarput nunani allani qanoq annertutigisumik nittarsaanneqartoq.

Inatsisartunut ilaasortaq Anders Olsen Siumut qinigaaffiup siuliani aaliangiiffigisassamik siunnersuuteqarpoq National Stadiummik pilersitsinissaq anguniarlugu qulaajaasussanik pilersitsisoqassasoq. Qulaajaanerup ersersippaa National Stadiummik pilersitsisoqassappat aningaasanik amerlasuunik tassa 300-500 mio. kr. miss. pisariaqassasut. Tamanna tungavigalugu siunnersuuteqartoq siunnersuummik nutaamik saqqummiusseqqippoq, tamatumuuna anguniarlugu nunatta inuiattut unammersuarterfissaanik FIFA-p piumasaqaataanut naapertuuttumik pilersitsisoqarnissaa anguniarlugu avataanit aningaasaliisussarsiuunnissaanut suleqatigiissitamik pilersitsisoqassasoq. Siumumi upperivarput siunissami National Stadium nunatsinni pilersinneqarsinnaasoq, FIFA-p aningaasaleeqataaffigisaanik, Namminersorlutik Oqartussat, kommunit allallu aningaasaateqarfiit soorlu ivingaasaaqqanik arsaattarfiliornermi taamatut iliortoqartareersoq.

Siunnersuut tamanna Siumumiik tamakkiisumik tapersorsorparput aningaasartuutissallu eqqarsaatigalugit nunatta inuiattut timersornikkut unammersuarterfissaanik pingaarnertinneqartariaqarpoq tamatumuuna naapertuuttumik piumasaqaatinut naammassinnittumik.



Anguniagaq una anguniarlugu qinigaaffiup siuliani Siumumiik oqaaseqaatiginikuusagut innersuussutigalugit siunnersuut matumuuna taperserlugu ataatsimiititaliamut susassaqartumut ingerlateqqipparput ataatsimiititaliarlu sulilluarnissaanik kissaallugu.

Doris Jakobsen Jensen

Siumut